

Dr. M yakin ikatan baik kekal

SINGAPURA, Khamis — Datuk Seri Dr. Mahathir Mohamad berkata hubungan baik antara Malaysia dan Singapura adalah tanggungjawab pemimpin dan rakyat kedua negara.

"Saya akan berusaha memastikan hubungan baik antara rakyat terus kekal dan saya percaya usaha ini akan berbalas," katanya.

Berucap di majlis makan malam yang diberikan oleh rakan sejawatnya, Encik Lee Kuan Yew, Perdana Menteri berkata, "Kita hidup dalam dunia di mana peristiwa berlaku serta-merta, temuramah segera dan juga komen yang segera.

"Tidak banyak masa untuk memikirkan sesuatu sebelum memberi komen mengenai masalah yang mempunyai kepentingan antarabangsa semasa ditemuramah dari jauh."

Jesteru itu, tambah beliau, komen yang dibuat 'tidak langsung difikirkan dan diberi secara spontan'.

"Akibatnya menjejaskan hubungan antara negara. Kami berharap hubungan baik yang kita jalin antara kedua negara kita tidak akan terjejas dengan peristiwa seperti ini," katanya.

"Saya akan berusaha memastikan hubungan baik antara rakyat terus kekal dan saya percaya usaha ini akan berbalas," tambah beliau.

Sementara itu, Encik Lee dalam ucapan balasnya menegaskan, beliau yakin Datuk Seri Dr. Mahathir akan mencapai segala cita-cita murninya untuk memperbaiki nasib hidup rakyat Malaysia.

Belliau mendoakan agar Datuk Seri Dr. Mahathir berjaya dalam menanamkan keazaman serta dedikasi dalam jentera kerajaan Malaysia yang bertujuan memperbaiki kehidupan rakyatnya.

Katanya, pentadbiran Datuk Seri Dr. Mahathir akan dapat memperbaiki iklim pelaburan serta meningkatkan pembangunan ekonomi di rantau ini.

Selanjutnya, Encik Lee berkata, beliau memang telah menjangka satu hari kelak beliau akan mengalu-alukannya Datuk Seri Dr. Mahathir sebagai Perdana Menteri Malaysia.

Mengenai hubungan dua hala, Perdana Menteri Singapura itu menegaskan, beliau percaya Malaysia dan Singapura kini mencapai persefahaman yang lebih menggalakkan.

Walaupun kedua pemimpin itu bertukar-tukar pendapat mengenai isu-isu antarabangsa dan serantau serta membincangkan pelbagai perkara dua hala, seorang pegawai

Malaysia yang mengiringi Perdana Menteri memberitahu Bernama, aspek paling penting dalam pertemuan itu ialah bertukar-tukar pandangan bagi mendapatkan persefahaman yang lebih baik sesama sendiri.

Pertukaran pandangan itu dianggap penting supaya persefahaman lebih baik yang diperolehi kelak dapat dijadikan asas bagi kepentingan bersama di masa akan datang.

Inilah lawatan pertama Datuk Seri Dr. Mahathir ke Singapura sejak menjadi Perdana Menteri. Rundingan itu berlangsung di Istana Villa - rumah penginapan tetamu kerajaan.

Kedua pemimpin juga membincangkan perkembangan di rantau ini, khususnya isu Kampuchea, keselamatan rantau ini dan Asean.

Datuk Seri Dr. Mahathir juga menyampaikan secara rasmi keputusan kerajaan Malaysia menggunakan zon waktu yang baru bagi seluruh negara.

Belliau juga menjelaskan penekanan baru Malaysia terhadap dunia sebelah timur dalam dasar luar negeri terutama negara-negara seperti Jepun dan Korea Selatan.

Bahan asal dari Arkib
Negara Malaysia